



Sumáriu Kazu
Tribunál Distritál Suai
Abril 2022

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.
JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

Totál kazu ne'ebé JSMP monitoriza: 23

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia domestika (artigu 2 kona-ba konseitu violensia domestika, artigu 3 kona-ba relasaun familia, artigu 35 kona-ba tipu krime violensia domestika no 36 kona-ba krime sira violénsia doméstika nian hanesan krime publiku)	10
Artigu 172 KP	Violasaun seksuál	1
Artigu 187 KP	Aktu seksuál ho adolexente	2
Artigu 172 KP no Artigu 253	Violasaun seksuá no roubu	1
Artigu 172 KP	Abuzu seksuál ba menór	1
Artigu 171 KP	Koasaun seksuál	1
Artigu 225 KP	La halo tuir obrigasaun alimentár	1
Artigu 145 KP	Ofensa ba integridade fizika simples	2
Artigu 259 KP	Danu agravadu	1
Artigu 244 KP, Artigu 20, nu 1, lei nu 5/2017, Arma Brankas	Dezobediénsia no Arma Brankas	1
Artigu 145 KP no Artigu 20, nu 1, lei nu 5/2017, Arma Brankas	Ofensa ba integridade fizika simples no arma brankas	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Artigu 316 KP	Kontra bandu	1
Total		23

2. Totál desizaun ne'ebé JSMP monitoriza:16

Tipu pena	Artigu	Númeru
Suspensaun ba prizaun nia ezelesaun	Artigu 68 KP	
Pena multa	Artigu 67 KP	1
Omologa	Artigu 216 KPP	3
Pena prizaun	Artigu 66 KP	1
Absolve		4
Total		16

3. Totál kazu sira ne'ebé adia tuir JSMP nia monitorizasaun: 0

4. Totál kazu sira ne'ebé sei kontinua tuir JSMP nia monitorizasaun: 8

B. Deskrisaun sumáriu julgamentu ba desizaun kazu sira:

1. Krime ofensa ba integridade fizika simples

Nú prosesu : 0036/20.CVSL
 Kompozisaun tribunál : Singulár
 Juis : Dra. Patricia de Araujo F. B. M. Xavier
 Prokuradór : Dr. Rafael Jeronimo Gusmão
 Defeza : Dr. Domingos dos Santos
 Desizaun : Omologa no dezistencia keixa

Iha 04 Marsu 2022, Tribunál Distritál Suai prezide julgamentu tentativa konsiliaun ba krime ofensa ba integridade fizika simples envolve arguidu Isac Madeira da Silva hasoru lezadu Januario de Lima Jose, iha Munisípiu Covalima.

Akuzasaun prokuradór

Prokuradór akuza katak iha 05 Juñu 2020, maizumenus iha oras tuku 18:00 lokraik, arguidu tebe dala tolu iha lezadu nia hirus matan halo lezadu monu tun ba rai, arguidu kontinua fai kilat ba lezadu nia matan fukun parte karuk, tuku dala ida iha ulun no tuku dala haat iha kotuk laran, rezulta kanek no ran sai barak.

Tuir mai arguidu dada sai lezadu husi uma laran no tula sae ba kareta no iha kareta leten arguidu nafatin halo agreasaun hasoru lezadu tuku dala barak iha kotuk laran no tebe dala rua tan iha kotuk laran, Antes ne'elezadu halo arguidu nia alin fetu isin rua ne'ebé sei eskola hela.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa.

Produsaun ba prova sira

Antes tama ba produsaun prova sira, tribunál bazeia ba artigu 262 KPP kona-ba tentativa konsiliaun ba kazu sira ho natureza semi públiku.

Iha tentativa konsiliaun ne'e lezadu hakarak desiste ninia keixa hasoru arguidu ho konsiderasaun arguidu labele repete tan ninia hahalok hasoru lezadu no ema seluk. Alende ne'e arguidu mós konkorda no simu lezadu ninia dexistensia keixa no promete katak sei larepete ninia hahalok hasoru lezadu, bainhira arguidu repete tan hahalok ne'e hasoru lezadu, arguidu prontu simu desizaun ne'ebé todan husi tribunál.

Alegasaun final

Prokuradór no defeza husu ba tribunál atu omologa akordu dame ne'ebé arguidu ho lezadu konkorda ona.

Desizaun

Tribunál bazeia ba lezadu ninia dexistensia keixa no omologa parte rua nia akordu dame no absolve arguidu husi instansia krime.

2. Krime ofensa integridade fizika simples ho natureza violénsia doméstika

Númeru prosesu : 0033/20.ANANV
Kompozisaun tribunal : Singulár
Juis : Dra. Patricia de Araújo Fatima Barreto Magno Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 6 suspende ba tinan 1

Iha 06 Abril 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika, ne'ebé envolve arguida EAG hasoru lezadu nu'udar nia la'en DdA, iha Munisipiu Ainaro.

Akuzasaun prokuradór

Prokuradór akuza katak iha 14 Outobru 2020, iha oras tuku 18:00, arguida hadau tiha lezadu nia telefone no tuku dala ida iha lezadu nia ren-toos kanek no ran sai. Antes ne'e arguida fila husi Dili mai uma no husu xave motor ba lezadu maibé lezadu lahatan buat ida , no sira diskuti malu, arguida nerboju komete krime ne'e hasoru lezadu.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

Produsaun ba prova sira

Iha julgamentu arguida konfesa faktu hotu iha akuzasaun no deklara katak depoisde akontesimentu liu fulan rua mak di'ak malu fali, arguida mak husu deskulpa ba lezadu, arguida arrepende ninia hahalok no promete sei la repete ninia hahalok ne'e iha futuru.

Arguida konfesa faktu hotu nune'e presinde lezadu.

Alegasaun final

Prokuradór, konsidera arguida provadu komete krime hasoru lezadu nu'udar nia katuas oan, prokuradór haree katak krime violénsia domestika aas tebes, nune'e atu prevene krime ne'e husu ba tribunál atu kondena arguida ho pena prizaun fulan tolu suspende ba tinan ida.

Entretantu defeza haktuir katak, arguida foin primeiravés mai hatan iha tribunál, di'ak malu ona ho lezadu, arrepende ninia hahalok no depoisde akontesimentu to'o agora lahalo ona problema, nune'e husu ba tribunál kondena arguida ho pena multa.

Desizaun

Depoisde avalia faktu hotu, tribunál prova katak arguida tuku dala ida iha lezadu nia rentos rezulta kanek ki'ik no ran sai.

Bazeia ba faktu provadu no tetu mós sirkuntansia atenuante no agravante, arguida foin mai hatan iha tribunál, arrepende ninia hahalok no di'ak malu ona, maibé tribunál haree katak arguidu ho lezada hamutuk fali ona no iha possibilidade bele akontese problema. Nune'e tribunál konklui prosesu ne'e no kondena arguida ba pena prizaun fulan tolu suspende ba tinan ida.

3. Krime ofensa ba integridade fizika simples ho natureza violénsia doméstika

Númeru prosesu : 0002/20.ANHTB
Kompozisaun tribunal : Singulár
Juis : Dra. Patricia de Araújo Fatima Barreto Magno Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun tinan 1 suspende ba tinan 2

Iha 07 Maiu 2022, Tribunál Distritál Suai prezide julgamentu leitura sentensa ba krime ofensa integridade fizika simples ho natureza violénsia doméstika envolve arguidu MdA hasoru nia feen , iha Munisípiu Ainaro.

Akuzasaun prokuradór

Prokuradór akuza katak iha 14 Janeiro 2020, iha oras tuku 17:00, lokraik arguidu foti ai-pedasuk ida baku iha lezada nia ulun parte karuk rejulta moras no ran sai no halo lezada oin nakukun monu kedan ba rai. Antes ne'e arguidu tama uma kalan boot ho kondisaun lanu no lezada tolok arguidu, hasai liafuan aat no arguidu mós tolok hasoru lezada no arguidu nerboju halo agreasaun ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

Produsaun ba prova sira

Iha prosesu julgamentu arguidu, konfesa faktu iha akuzasaun no deklara katak momentu ne'e baku lezada tanba lezada tolok arguidu, depois akontesimentu to'o agora labaku ona lezada, arrepende ninia halo hahalok no promete futuru sei larepete ninia hahalok.

Alegasaun finál

Prokuradór, haktuir katak arguidu provadu komete krime hasoru lezada, mesmu sira di'ak malu ona maibé prevene iha futuru atu la akontese, husu ba tribunál atu kondena arguidu tuir konfiksaun tribunál nian.

Entretantu defeza, haktuir katak agora dadaun ne'e sira di'ak malu ona no to'o agora arguidu la halo krime hasoru lezada, parte seluk arguidu promete sei larepe ninia hahalok hanesan iha futuru, nune'e husu ba tribunál atu kondena arguidu ho pena multa.

Desizaun

Depoisde avalia faktu hotu, tribunál prova katak arguidu foti ai-pedasuk ida baku lezada nia ulun parte karuk rezulta moras, ran sai, oin nakukun no halo lezada monu ba rai.

Bazeia ba faktu provadu hirak ne'e no tetu mós sirkuntansia atenuante sira hanesan arguidu foin primeiravés mai hatan iha tribunál, arrepende ninia hahalok, maibé tribunál haree katak

krime violénsia domestika aas tebes, nune'e konklui prosesu ne'e no kondena arguidu ho pena prizaun tinan ida suspende ba tinan rua.

4. Krime Aktu seksuál ho adolexente

Númeru prosesu : 0056/20.PDSUA
Kompozisaun tribunal : singulár
Juis : Dr. Samuel da Costa Paicheco
Prokuradór : Dr. Rafael Jeronimo Gusmão
Defeza : Dr. Albano Maia
Desizaun : Absolve

Iha 07 Abril 2022, Tribunál Distritál Suai prezide rejulgamentu leitura sentensa ba krime Aktu seksuál ho adolexente, ne'ebé envolve arguidu SJdM hasoru lezada AM, iha Munisípiu Covalima.

Akuzasaun Prokuradór

Prokuradór akuza katak iha 24 Dezembru 2020, arguidu kontaktu lezada no hasoru malu, hafoin ne'e arguidu ho lezada hasoru malu iha lezada nia maun nia uma ne'ebé mamuk, tuir mai arguidu hakuak lezada, rei no susu lezada nia orgaun sensitivu no hasai lezada nia roupa no arguidu mós hasai nia roupa, arguidu mós haruka lezada susu arguidu nia orgaun seksuál no halo relasaun seksuál to'o ezakula. Kalan ne'e arguidu ho lezada halo relasaun seksuál hamutuk dala haat.

Prokuradór akuza arguidu kontra artigu 178 KP kona-ba aktu seksuál ho adolexente moldura penál tinan 5.

Produsaun ba prova sira.

Iha prosesu julgamentu, arguidu deklara katak nia kuiñese lezada hanesan ninia namorada, arguidu deklara katak momentu ne'ebá sira nain rua kalan ne'e hasoru malu no sira nain rua halo duni relasaun seksuál maibé la'os dala haat, sira halo relasaun seksuáldala rua de'it.

Arguidu deklara liu tan katak sira halo relasaun seksuál ne'e ho konsentimentu ka hakarak ho hakarak. Alenden ne'e lezada kontinua konfirma faktu hotu iha akuzasau no reforsa liu tan katak kalan halo relasaun seksuál ne'e ho konsentimentu.

Alegasaun finál

Prokuradór haktuir katak, husu ba tribunál atu fó justisa ba arguidu, ne'ebé tuir deklarasaun sira nian ne'ebé produs ona iha julgamentu.

Entretantu defeza haktuir katak, durante produsaun ba prova arguidu deklara katak halo duni relasaun seksuál ho lezada maibé dala rua de'it la'os dala haat, alende ne'e defeza haree katak lezada nia tinan moris iha 27 Abril 2002, tanbá ne'e momentu ne'eba lezada atinji ona tinan 17, tanba ne'e defeza haree katak arguidu ninia hahalok ne'e la priense krime ne'e rasik, nune'e husu ba tribunál atu absolve arguidu ba krime ne'e no absolve arguidu selu kusta judisiál.

Desizaun

Depoide avalia faktu hotu, Tribunál konsidera faktu ne'ebé inputa ba arguidu la provadu, tanba akontesimentu ne'e lezada atinji ona tinan 17. Tribunál bazeia ba faktu la provadu ne'e tetu sirkuntansia hotu-hotu, nune'e konklui absolve arguidu husi krime.

5. Krime la halo tuir obligasaun alimentár

Nú prosesu : 0066/21.PDSUA
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Omologa dezistencia keixa

Iha 08 Abril 2022, Tribunál Distritál Suai prezide julgamentu tentativa konsiliaun ba Krime la halo tuir obrigasaun alimentár, envolve arguidu OCM, hasoru lezadu menór LJMG idade tinan (5) no lezadu AC ho idade tinan (3), iha Munisípiu Covalima.

Akuzasaun Prokuradór

Prokuradór akuza katak iha 06 Maiu 2021, liu husi konferensia arguidu konkorda atu fó alimentasaun kada fulan US\$ 20.00 ba lezadu nain rua. Maibé arguidu lakumpri nia obrigasaun hodi fó alimentasaun.

Prokuradór akuza arguidu kontra artigu 225 KP kona-ba la halo tuir obrigasaun alimentár ho moldura penál tinan 3 ka multa.

Produsaun ba prova sira

Tribunál bazeia ba artigu 262 KPP, nune'e halo tentativa konsiliaun ba kazu sira ho semi públiku.

Alende ne'e representa menór (inan), husu ba tribunál atu husu arguidu hanesan aman ba menór nain rua atu fó osan alimentasaun ne'ebé durante fulan sanulu nia laran arguidu la fó ba nia oan sira no nafatin husu arguidu atu kumpri desizaun ba kazu sivil regulasaun exersisiu poder paternál ne'ebé arguidu antes ne'e konkorda.

Arguidu konkorda no prontu nafatin kumpri desizaun ne'ebé iha, alende ne'e arguidu mós hasai osan total hamutuk US\$ 200.00 ba iha rekerida inan, ne'ebé durante arguidu la fó alimentasaun lezadu monór nain rua.

Alegasaun finál

Prokuradór no defeza husu ba tribunál atu omologa prosesu ne'e.

Desizaun

Tribunál bazeia ba karta dezistencia keisa ne'e no konklui absolve arguidu hosi krime nia instansia.

6. Krime Ofensa Ba Integridade Fízika Simples ho Natureza Violénsia Doméstika

Nú. Prosesu : 0017/21.CVMCT
Kompozisaun Tribunál : Singulár
Juiz : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 11 Abril 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AdN hasoru nia feen, iha Munisípiu Covalima.

Akuzasaun Prokuradór

Prokurador akuza katak iha 23 Jullu 2021 iha 17:40, lokraik, arguidu dada lezada nia kanuruk, ka'er fuuk, tuku dala ida iha ulun no tuku dala ida iha lezada nia matan fukun parte karuk. Antes ne'e, arguidu fila husi toos mai uma arguidu atu han maibé modo la iha, nune'e arguidu ho lezada diskute malu no arguidu komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 kona-ba Lei Kontra Violénsia Doméstika (LKVD).

Produsaun ba Prova sira

Iha prosesu julgamentu, arguidu konfesa integralmente ba faktu sira iha akuzasaun, arrepende nia hahalok, promete sei lakomete aktu hanesan iha futuru no depoisde akontesimentu arguidu labaku ona lezada to'o ohin lora.

Alende ne'e, lezada kontinua konfirma faktu sira iha akuzasaun no deklara katak sira nain rua di'ak malu ona no depoisde akontesimentu arguidu la halo ona agresaun fíziku hasoru lezada.

Alegasaun finál

Prokuradór, haktuir katak iha julgamentu arguidu konfesa faktu hotu no konfirma husi lezada sein rezerva, nune'e konsidera arguidu provadu komete krime hasoru lezada no husu ba tribunál atu kondena arguidu tuir artigu 145 KP.

Enkuantu defeza haktuir katak, arguidu foin mak mai hatan iha tribunál, arrepende ninia hahalok no depoisde akontesimentu arguidu labaku lezada to'o ohin lora, nune'e husu ba tribunál atu deside tuir konfiksaun tribunál nian.

Desizaun

Depoisde avalia faktu sira hotu, tribunál prova arguidu halo duni agresaun hasoru lezada, dada lezada nia kanuruk, ka'er lezada nia fuuk, tuku dala ida iha ulun no tuku dala ida lezada nia matan fukun parte karuk.

Bazeia ba faktu provadu sira no tetu mós sirkuntansia atenuante sira hanesan arguidu foin primeiravéz mai hatan iha tribunál, arguidu promete katak sei larepete hahalok ne'e hasoru lezada no sira nain rua di'ak malu ona, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

7. Krime ofensa ba integridade fizika simples ho natureza violénsia doméstika

Numeru prosesu	: 0003/20.CVFTK
Kompozisaun tribunal	: Singulár
Juis	: Dra. Patricia de Araujo Fatima Barreto Magno Xavier
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Pena prizaun tinan 1 suspende ba tinan 2

Iha 11 Abril 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika, envolve arguidu MP hasoru lezada nia feen EB, QdRM no JF hanesan arguidu ho lezada nia oan sira, iha Munisipiu Covalima.

Akuzasaun prokuradór

Prokuradór akuza katak iha 26 Outobru 2020, iha oras tuku 19:00 kalan, arguidu ho lezada haksesuk malu nune'e, lezadu QdRM hakilar no hatete *hoe imi nonok lahatene ka imi hanesan ne'e ami oan sira moe* no lezadu baku meza masa ida rahun tiha. Arguidu nerbozu basa dala rua iha lezadu nia ibun rejulta moras no kanek. Tuir mai lezada EB koko atu ba hafahe sira, maibé arguidu buti lezada nia kakorok no dudu ba kama leten. Alende ne'e lezadu JF hasee arguidu katak *apa imi hanesan ne'e halo ami oan sira moe loos*, hafoin koa'lia tiha nune'e arguidu tuku dala ida iha lezada nia hasan parte karuk, lezada hanesan inan nafatin hafahe arguidu, maibé arguidu ka'er lezada nia fuuk no riba lezada ba rai.

Prokuradór akuza arguidu konkursu krime 3 kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2 (a), 3, (a,c) 35, (b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun no deklarata katak depoisde akontesimentu liu lora tolu mak di'ak malu fali, agora dadaun ne'e nafatin hela hamutuk no labaku ona lezada no lezadu sira, arguidu arrepende ninia hahalok, promete iha futuru sei larepete hahalok ne'e hasoru lezada no lezadu sira no ema seluk, arguidu haktuir liu tan katak foin primeiravéz mai hatan iha tribunál.

Presinde lezada/u sira, tanba arguidu konfesa faktu hotu.

Alegasaun finál

Prokuradór, haktuir katak arguidu provadu komete krime konkursu tolu hasoru lezada no lezadu sira. Prokuradór haree katak kazu violénsia doméstika ne'e aas tebes, tanba ne'e atu halo prevensaun jerál ba iha krime ne'e, husu ba tribunál atu kondena arguidu ho pena únika tinan rua suspende ba tinan rua.

Enkuantu defeza, haktuir katak iha julgamentu arguidu konfesa no arrepende ninia hahalok, depoisde akontesimentu arguidu labaku ona lezada lezadu sira to'o ohin lora, arguidu mós la iha antisidentes kriminais. Nune'e husu ba tribunál kondena arguidu ho pena.

Desizaun

Depoisde avalia faktu hotu, tribunál prova arguidu provadu komete krime ofensa ba integridade fizika simples ho natureza violénsia doméstika hasoru nia feen no nia oan nain rua.

Tribunál bazei ba faktu provadu no tetu sirkuntansia atenuante hanesan arguidu foin primeiravéz mai hatan iha tribunál, areepende ninia hahalok no agora di'ak malu ona, maibé tribunál mós haree katak kazu violénsia doméstika mós aas tebes nune'e atu halo prevensaun ba krime ne'e, tribunál konklui prosesu ne'e no kondena arguidu ho krime tolu no tribunál aplika pena únika prizaun tinan ida suspende ba tinan rua.

8. Krime ofensa ba integridade fizika simples ho natureza violénsia doméstika

Numeru prosesu	: 0006/18.CVFHR
Kompozisaun tribunal	: Singulár
Juis	: Dra. Patricia de Araujo Fatima Barreto Magno Xavier
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Pena prizaun fulan 6 suspende tinan 1

Iha 11 Abril 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika, arguidu JA hasoru lezada nia eis feen FS, iha Munisípiu Covalima.

Akuzasaun prokuradór

Prokuradór akuza katak iha 06 Agustu 2018, iha oras tuku 20:00 arguidu lori ai lolon ida baku dala rua iha lezada nia kabas, dala rua iha kanotak no dala rua iha knosen. Antes ne'e arguidu deskonfia lezada ho mane seluk, nune'e arguidu husu tuir maibé lezada nega, arguidu nerboju no halo agreasaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

Produsaun ba prova sira

Iha prosesu julgamentu arguidu hili direitu nonok, alenden ne'e lezada konfirma faktu sira iha akuzasaun no deklarata katak moris separa ona ho arguidu.

Alegasaun finál

Prokuradór, konsidera arguidu provadu no prosidente tuir faktu iha akuzasaun, mesmu iha julgamentu arguidu nonok maibé lezada kontinua konfirma faktu iha akuzasaun, prokuradór haree katak mesmu sira fahe malu ona maibé haree krime violénsia doméstika aas tebes, nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak husu ba tribunál atu decide tuir konfiksaun tribunál nian.

Desizaun

Depoizde availia faktu hotu, tribunál prova katak arguidu komete krime ofensa integridade fizika simples tuir artigu 145 KP ho forma violénsia doméstika hasoru nia eis feen.

Bazeia ba faktu provadu sira ne'e tetu mós sirkuntansia atenuante sira hanesan arguidu foin primeiravéz mai hatan iha tribunál, nune'e konklui prosesu ne'e no kondena arguidu ho pena prizaun fulan neen suspende ba tinan ida.

9. Krime violasaun seksuál no krime roubu

Nu prosesu	: 0004/21.MFALS
Kompozisaun tribunál	: Koletivu
Juis	: Dr. Samuel da Costa Pacheco, Dr. Benjamin Barros no Dra. Patricia de Araujo Fatima Barreto Magno Xavier
Prokuradór	: Dr. Gustavo da Silva
Defeza	: Dr. Domingos dos Santos
Desizaun	: Absolve

Iha 12 Abril 2022, Tribunál Distritál Suai prezide julgamentu leitura akordaun ba krime violasaun seksuál ne'ebé envolve arguidu FdCA hasoru lezada AdCF, iha Munisípiu Manufahi.

Akuzasaun prokuradór

Prokuradór akuza katak iha 07 Juñu 2021, iha oras tuku 10:00 dadeer lezada mesak tur iha kuartu laran, derepente arguidu tama ba lezada nia kuartu laran no taka oin metin, arguidu hosi lezada nia kotuk latan lezada ba kama laran no taka metin lezada nia oin no foti lezada nia kalsa ida taka metin lezada nia ibun, hafoin arguidu hasai lezada nia roupa ne'ebé lezada hatais, tuir mai arguidu obriga halo relasaun seksuál to'o ejakula. banhira halo hotu tiha

relasaun seksuál arguidu kontinua tuku dala ida iha lezada nia kanuruk, kabas sorin karuk, tuku iha lezada nia hirus matan buti lezada nia kakorok no ameasa lezada hodi husu osan US\$ 50.00 maibé osan la iha nune'e fó de'it US\$20.00 ba arguidu, no ameasa lezada nafatin no hatete katak kalan mak mai foti tan osan US\$ 30.00 restu ne'e.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15 no artigu 253 KP kona-ba roubu ho moldura penál tinan 3 to'o tinan 10.

Produsaun ba prova sira

Iha prosesu julgamentu, arguidu nega faktu sira iha akuzasaun, arguidu deklar katak momentu loron akontesementu arguidu ho nia feen no oan feto sai husi uma iha oras tuku 7:00 dadeer ba iha sira nia natar hodi halo kabubu, arguidu deklar katak sira halo grupu mak ba halo kapupu iha sira nia natar no arguidu mak hanesan sira nia xefe. Arguidu deklar katak polisia derepente ba ka'er arguidu mak foin hakfodak, arguidu deklar katak kazu ida ne'e dun de'it tanba iha problema seluk hanesan lezada nia naan sira hadau malu rai.

Alende ne'e, lezada kontinua konfirma faktu hotu iha akuzasaun no deklar katak momentu ne'e arguidu hateten katak *'hau halo ona relasaun seksuál ho ita boot tanba ne'e ita nain rua tenke hola malu*, lezada mós hatan katak *'naran katak ó nia feen hakarak ita nain rua hola malu*, hafoin arguidu mós hasai hena ne'ebé hodi taka ninia oin nune'e halo lezada mós kuiñese arguidu.

Testemuña BP hanesan xefe aldeia, depoimenta katak momentu akontesimentu ne'ebá iha oras tuku 08:00 dadeersan testemuña foin ba ninia natar ne'ebé besik malu ho arguidu, testemuña depoimenta katak iha oras tuku 9:30, Polisia telefone xefe aldeia no husu tuir arguidu nia paradeiru no husu xefe aldeia atu lori arguidu fila ba uma, tuir mai xefe aldeia ba arguidu nia natar no fó hatene ba arguidu no haruka arguidu fila ba uma, bainhira besik to'o iha uma Polisia kaer kedan arguidu no testemuña fila-fali ba ninia natar, testemuña depoimenta tan katak la iha kuiñesimentu ba kazu ne'e.

Testemuña ME, hanesan arguidu nia feen hili direitu ko'alia, testemuña depoimenta katak momentu akontesementu ne'e testemuña, arguidu ho nia oan feto ida hamutuk ho sasin sira seluk iha oras tuku 07:00 dadeersan atu ba natar, testemuña haktuir katak momentu iha natar laran arguidu lasai husi fatin ne'ebá no iha oras tuku 10:00 dadeer hanesan ne'e xefe aldeai bolu arguidu no sira nain rua fila ba uma, testemuña depoimenta liu tan katak momentu lokraik fila ba uma foin rona Polisia kaer ona arguidu katak arguidu estraga lezada.

Testemuña JdC, depoimenta katak momentu akontesimentu ne'e, testemuña la'o hamutuk ho arguidu ba natar tanba sira halo grupu atu ba halo natar, testemuña depoimenta tan katak la iha kuiñesimentu ba kazu ne'e. testemuña depoimenta katak iha oras tuku 10:00 dadeer arguidu ho sasin sira, nafatin iha natar laran hodi halo kabubu no derepente xefe aldeia ba bolu arguidu fila ba uma, testemuña depoimenta tan katak lokraik fila ba uma rona informasaun katak arguidu polisia ka'er ona.

Testemuña DG, depoimenta katak momentu ne'eba iha oras tuku 7:00 lao hamutuk ho arguidu, nia feen no nia oan feto id aba natar atu halo kapupu, tanba sira halo grupu halo natar, testamuña depoimenta katak la iha kuinesimentu ba kazu ne'e. Testémuña depoimenta tan katak iha oras tuku 9:30 dadeer hanesan ne'e xefe aldeia ba bolu arguidu fila ba uma no lokraik fila mai uma rona Polisia ka'er ona arguidu.

Alegasaun finál

Prokuradór haktuir katak, iha produsaun ba prova arguidu nega hotu faktu sira iha akuzasaun, maibé lezada konfirma akuzasaun prokuradór nian, alende testemuña sira deklara katak momentu akontesimentu ne'e arguidu ho testemuña sira iha natar laran, mesmu nune'e prokuradór husu ba tribunál atu fó justisa ne'ebé justu ba argudu.

Entretantu defeza haktuir katak, iha julgamentu produsaun ba prova, arguidu deklara katak ho testemuña sira ba natar no oras akontesimentu ne'e arguidu ho testemuña sira iha natar laran, defeza haree katak arguidu ho lezada no testemuña sira nia deklarasaun lahanesan tanba ne'e defeza duvida no husu ba tribunál atu absolve.

Desizaun

Depoizde avalia faktu hotu, tribunál la fó prova ba krime rua ne'ebé inputa ba arguidu, tribunál la prova tanba iha momentu akontesimentu ne'e iha oras tuku 10:00 dadeer nPolísia foin mak telefone xefe aldeia hanesan testemuña no testemuña sira seluk mós reforsa liu tan katak momentu iha oras tuku 10:00 dadeer ne'e arguidu ho testemuña sira iha natar laran halo kabubu.

Tribunál bazeia ba faktu la provadu ne'e no absolve arguidu ba krime rua ne'ebé inputa ba arguidu no tribunál mós halo alterasaun medida prizaun preventiva ba fali medida TIR-Termu Identidade Rezidencia no imidiata liberta arguidu.

10. Krime aktu seksuál ho adolexente

Nú prosesu	: 0061/17.CVSUI
Kompozisaun tribunál	: Singulár
Juis	: Dr. Benjamin Barros
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Absolve

Iha 21 Abril 2022, Tribunál Distritál Suai prezide julgamentu leitura sentensa ba krime aktu seksuál ho adolexente envolve arguidu DDJ hasoru lezada DdLA, iha Munisípiu Covalima.

Akuzasaun prokuradór

Prokuradór akuza katak iha 15 Abril 2017, oras la apuradu, kalan arguidu ho lezada halo relasaun seksuál primeiru iha lezada sira nia uma.

Tuir mai iha 19 Juñu 2017, arguidu ba tula lezada iha eskola no tula lezada ba uma no arguidu ho lezada halo relasaun seksuál.

Akontese tuir mai iha 27 Jullu 2017, iha oras tuku 15:00 lokraik, arguidu ba iha lezada nia uma no husu lezada halo relasaun seksuál.

Tuir mai halo relasaun seksuál ba dala haat iha 30 Jullu 2017, iha oras tuku 11:00 arguidu nafatin ba iha lezada nia uma lori lezada ba iha suco Debus no sira halo relasaun seksuál.

Ikus liu iha 08 Agustu 2017, oras la apura maibé kalan, arguidu nafatin ba iha lezada nia uma no halo relasaun seksuál. Halo relasaun seksuál dala lima ne'e arguidu nunca obriga no la ameasa lezada.

Prokuradór akuza arguidu kontra artigu 178 KP kona-ba aktu seksuál adolexente ho moldura penál tinan 5 prizaun.

Produsaun ba prova sira

Iha prosesu julgamentu, arguidu konfesa integralmente ba faktu iha akuzasaun, arguidu deklarata katak halo relasaun seksuál primeiru lezada nia orgaun seksuál la ran no nia latanis, arguidu deklarata tan katak halo relasaun seksuál ba dala rua ne'e arguidu ba tula lezada iha eskola depois lori ba lezada nia uma no ho lezada nia konsentimentu sira halo relasaun seksuál. Arguidu deklarata liu tan katak halo relasaun seksuál ba dala tolu ne'e iha lezada sirania uma no lezada nia inan sira hatene, arguidu deklarata katak halo relasaun seksuál ikus liu ne'e lezada mak ba iha arguidu nia uma no hakarak ho hakarak sira halo relasaun seksuál.

Alende ne'e lezada kontinua konfirma faktu hotu iha akuzasaun no deklarata katak momentu lezada mai keixa arguidu tanba momentu antes atu halo relasaun seksuál ne'e arguidu promete atu hola lezada nune'e lezada mós hakarak halo relasaun seksuál ho arguidu. Lezada haktuir katak lezada antes ne'e iha ona doben seluk no moris hamutuk ona hanesan feen-laen.

Alegasaun finál

Prokuradór haktuir katak, iha julgamentu arguidu konfesa no konfirma husi lezada, tanba ne'e husu ba tribunál atu decide tuir konfiksaun tribunál nian.

Entretantu defeza haktuir katak, iha prosesu julgamentu ne'e arguidu konfesa no lezada konfirma, maibé defeza bazeai ba lezada nia deklarasaun katak lezada antes ne'e halo ona relasaun seksuál ho nia doben seluk, tanba ne'e defeza husu ba tribunál atu aplika pena suspensaun ne'ebé kman ba arguidu.

Desizaun

Depoisde avalia faktu hotu, tribunál konsidera faktu ne'ebé dun ba arguidu ne'e la provadu tanba haree ba lezada nia esperensia antes kona-ba seksuál nian, nune'e tribunál konklui prosesu no absolve arguidu hosi krime.

11. Ofensa ba Integridade Fízika Simples

Nú prosesu	: 0073/21. CVSUI
Kompozisaun tribunal	: Singular
Juiz	: Dr. Samues da Costa Pacheco
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Omologa pedidu dezisténsia ba keixa

Iha 22 Abril 2022, Tribunál Distritál Suai prezide julgamentu tentativa konsiliaun ba krime Ofensa ba Integridade Fízika Simples ne'ebé envolve arguidu Augusto de Araújo ho Abeliño de Araújo, hasoru lezadu Marcelino Sarmiento ho Martinho Gusmão, iha Munisipiu Covalima.

Akuzasaun

Prokuradór akuza katak iha 12 Outubru 2021, iha oras tuku 19:00 kalan, arguidu Agostu ka'er besi kanu ida baku lezadu nia ulun rejulta lezadu monu tun ba rai, arguidu sira kontinua sama tan lezadu, alende ne'e lezadu Marselino haree lezadu Martinho latan hela nune'e lezadu Marselino atu ba ajuda lezadu Martinho, maibé arguidu Agostu foti ai-pedasuk ida baku kedas dala ida iha lezadu Marselino nia ulun. Antes ne'e arguidu ho lezadu odiu malu tanba arte marsias.

Prokuradór akuza arguidu sira kontra artigu 145 KP kona-ba ofensa ba Integridade Fízika Simples ho moldura penál tinan 3 ka multa.

Produsaun ba prova sira

Bazeia ba artigu 262 hosi Kódigu Prosesu Penal (KPP), kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira ho lezadu sira.

Iha prosesu tentativa konsiliaun ne'e, lezadu Marcelino Sarmiento ho Martinho Gusmão prontu atu deziste ninia keixa ne'e maibé ho kondisaun katak arguidu nain rua kada ema ida fó US\$ 25.00, konsidera osan ida ne'e hodi selu fila fali aimoruk ne'ebé mak lezadu sira gasta ba nia saúde. Alende ne'e arguidu nain prontu fó fila osan ne'ebé lezadu sira uza ba tranta ba ninia saúde, entretantu arguidu sira mós promete katak sei la repete ninia hahalok ne'e hasoru lezadu no inklui ema seluk.

Alegasaun finál

Prokuradór no defeza konkorda ho parte rua nia akordu dame malu ne'e, no husu ba tribunál atu omologa prosesu ne'e.

Desizaun

Bazeia ba akordu husi parte sira no pedidu deziténsia husi lezadu sira, tribunál omologa prosesu ne'e no absolve arguidu sira husi krime.

12. Krime abuzu seksuál ba menór no agravaun

Nú prosesu : 0014/21.BBATB
Kompozisaun tribunal : Koletivu
Juiz : Dr. Samuel da Costa Paseco, Dr. Benjamin Barros no
Dra. Patricia de Araujo F. B. M. Xavier
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Pena Prizaun tinan 14

Iha 22 Abril tinan 2022, Tribunál Distritál Suai prezide julgamentu leitura akordaun ba krime abuzu seksuál ba menór ho agravaun envolve arguidu PdSP hasoru lezada nu'udar nia subriña JdCP, iha Munisípiu Bobonaro.

Akuzasaun Prokuradór

Prokurador akuza katak iha 11 outubru 2021, iha oras 20:00 kalan lezada sente soe bee moras no sai ba soe bee iha liur, besik kedas iha uma kotuk, hafoin soe bee hotu lezada dada sae nia kalsa, derepente arguidu bolu lezada, nune'e lezada leno lampra ba arguidu, tuir mai arguidu la'o ba besik lezada, arguidu ka'er lezada nia liman lori lezada ba iha sukaer hun no arguidu dada tun lezada nia roupa no arguidu hatama nia liman fuan dala ida ba lezada ninia orgaun seksuál no lezada sente nia orgaun seksuál moras nune'e lezada atu hakilar, maibé arguidu taka lezada niaibun. Arguida hateten ba lezada *ó ba uma labele fó hatene ba ó nia ama no tiun sira*, lezada mós la'o ba ninia uma no arguidu mós fila ba ninia uma. Banhira lezada to'o iha uma, lezada sente nia orgaun seksuál moras no ran sai barak nune'e tama ba kuartu laran troka tiha nia roupa.

Loron tuir mai lezada fila husi eskola no han hotu ho nia bin ba haree televizaun iha viziñu nia uma, lezada tur iha rai no bainhira lezada hamri'ik atu tur fali iha kadeira, maibé lezada nia bin hare lezada nia kotuk ran no sulin ba lezada nia ain no fatin ne'ebé lezada tur ne'e mós ran hotu, nune'e lezada nia bin fó hatene ba lezada dehan ó nia saia ne'e ran hotu kedas, ho ida ne'e lezada ho nia bin fila ba ninia uma no lezada nia bin fó hatene ba iha lezada nia inan no lori lezada ba kuartu no haree lezada nia kondisaun ne'e, maibé ran sulin nafatin, nune'e lori kedan

lezada ba iha Ospital Rairobo no evakua kedas ba iha PRADET Maliana hodi halo ezaminasaun, hafoin ne'e lezada koalia sai kona-ba nia orgaun seksuál kanek ne'e katak arguidu mak hatama liman fuan ba lezada nia orgaun seksuál no kanek.

Prokurador akuza arguidu kontra artigu 177 KP konaba abuzu seksual ba menór ho moldura penál tinan 5 to'o 20 no artigu 182 KP kona-ba agravasaun.

Produsaun de prova

Iha julgamentu arguidu nega faktu hotu iha akuzasaun, arguidu deklara katak momentu akontesimentu iha oras tuku 08:00 kalan toba dukur ona iha ninia uma ho nia feen no nia oan sira.

Arguidu deklara liu tan katak momentu lezada nia inan lori lezada ba iha Maliana ne'e lezada nia inan telefone ba arguidu katak lezada nia orgaun seksuál kanek ai mak kona.

Alende ne'e lezada konfirma faktu hotu iha akuzasaun no deklara katak haree arguidu sente tauk.

Testemuña FTP hanesan lezada nia inan hili direitu koalia, testemuña depoimenta katak, lezada nia bin mai informa ba lezada nia saia bokon ho ran, testemuña lori tama lezada ba kuartu laran hodi haree lezada nia orgaun seksuál kanek no ran sai barak, nune'e testemuña lori lezada ba iha sentru saúde iha Rairobo, depoisde haree lezada nia orgaun seksuál ran sai nafatin nune'e trasfere ba iha PRADET Maliana hodi halo visum, hafoin ne'e lezada koalia sai katak arguidu mak hatama ninia liman fuan ba lezada nia orgaun seksuál. Testemuña haktuir tan katak kalan akontesimentu ne'e latelefone arguidu no lahateten ba arguidu katak lezada nia orgaun seksuál kanek ne'e ai mak kona.

Alegasaun finál

Prokurador, konsidera arguidu provadu komete krime abuzu seksuál hasoru lezada, mesmu iha julgamentu arguidu nega faktu hotu, maibé lezada kontinua konfirma faktu no reforsa husi testemuña no relatoriu ezaminasaun husi PRADET, ho nune'e husu ba tribunál atu kondena arguidu ho pena prizaun tinan sanulu resin haat.

Entretantu defeza haktuir katak, iha julgamentu ne'e arguidu nega katak nia labolu lezada no lahatama liman fuan ba lezada nia orgaun seksuál, maibé lezada mai kontinua kofirma faktu no reforsa husi testemuña, defeza duvida ho deklarasaun sira husi parte sira nune'e husu ba tribunál atu deside tuir konfiksaun tribunál nian.

Desizaun

Tribunál koletivu halo alterasaun kulifikasaun jurídika krime abuzu seksuál artigu 177 KP nú 1 ba fali artigu 177 KP nú 2. Prokuradór no defeza la iha opozisaun ba altersaun ne'e.

Depoisde avalia faktu hotu, tribunál konsidera arguidu nega faktu hotu iha akuzasaun, maibé tribunál fó konsiderasaun liu ba deklarasaun lezada nian, testemuña no rezultadu ezaminasaun husi PRADET, katak arguidu bolu lezada no hasai lezada nia roupa hatama nia liman fuan ba lezada nia orgaun seksuál, tuir relatóriu médiku haktuir katak lezada nia orgaun seksuál kanek, tribunál bazeia ba faktu sira provadu no tetu sirkuntansia agravante katak lezada foin tinan 10, arguidu nega, tanba ne'e tribunál konklui prosesu ne'e no kondena arguidu ho pena prizaun tinan sanulu resin haat.

13. Krime ofensa ba integridade fizika simples ho natureza violénsia doméstika

Numeru prosesu : 0006/21.CVFTK
Kompozisaun tribunal : Singulár
Juis : Dra. Patricia de Araújo Fatima Barreto Magno Xavier
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Pena prizaun tinan 1 suspende ba tinan 1fulan 6

Iha 25 Abril 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika, AHB, hasoru lezada MdC no YRdS (sira nia oan), iha Munisípiu Covalima.

Akuzasaun prokuradór

Prokuradór akuza katak iha 02 Novembru 2021, iha oras tuku 10:15 dadeer arguidu tuku dala rua iha lezada nia kanuruk no tuku dala rua iha lezada nia inus, ho arguidu nia agreasaun ne'e sira nia oan dehan ba lezada katak hato'o keixa ba Polísia, hafoin ne'e arguidu tuku dala ida lezadu (arguidu ho lezada nia oan) nia liman. Antes ne'e arguidu husu osan ba lezada atu haruka ba arguidu nia familia sira iha Indonezia ba loron matebian nian, maibé lezada la resposta nune'e arguidu halo agreasaun ne'e hasoru lezada no lezadu.

Prokuradór akuza arguidu konkursu krime rua kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2 (a), 3, (a,c) 35, (b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak arrepende ninia hahalok, foin primeiravéz mai hatan iha tribunál no depoisde akontesimentu kalan ne'e di'ak malu kedas.

Tanba arguidu konfesa faktu hotu, nune'e presinde lezada ho lezadu sira.

Alegasaun finál

Prokuradór haktuir katak, arguidu provadu no presidente tuir faktu sira iha akuzasaun hasoru lezada no lezadu, mesmu sira di'ak malu ona maibé sira hela hamutuk nafatin nune'e iha possibilidade krime bele akontese fial fali, no atu prevene krime ne'e la akontese fali iha futuru nune'e husu ba tribunál atu kondena arguidu ho pena únika tinan ida suspende ba tinan ida.

Entretantu defeza, haktuir katak arguidu iha julgamentu, hatudu ninia arrependementu no depoisde akontesimentu to'o agora arguidu labaku ona lezada no lezadu no arguidu mós la iha antesidentes kriminais, nune'e husu ba tribunál atu deside tuir tribunál nia konfiksaun.

Desizaun

Depoisde avalia faktu sira hotu, tribunál prova katak arguidu halo agresau hasoru lezada no lezadu (sira nia oan), arguidu tuku dala rua iha lezada nia kanuruk no tuku dala rua iha lezada nia inus no tuku dala ida iha lezadu nia liman.

Bazeia ba faktu provadu sira ne'e no tetu mós sirkunstansia atenuante sira hanesan arguidu foin primeiravéz mai hatan iha tribunál, arrepende ninia hahalok no depoisde akontesimentu arguidu labaku ona lezada no lezadu to'o ohin loron, nune'e tribunál konklui prosesu ne'e no kondena arguidu ba krime rua ne'e tribunál aplika pena prizaun tinan ida suspende ba tinan ida fulan neen.

14. Dezobediensia no prátika ilísita ba Arte Marsiais

Nú. Prosesu : 0112/21.PDSUA
Kompozisaun Tribubál : Singulár
Juiz : Dra. Patricia de Araujo Fatima Bareto Magno Xavier
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Pena Multa US\$ 45.00

Iha 25 Abril 2022, Tribunál Distritál Suai prezide julgamentu leitura sentensa ba krime dezobediensia no prátika ilísita ba arte marsiais, envolve arguidu Natercia De Araújo Gomes ho Jerónimo Dos Santos Mendonça, hasoru estadu RDTL, iha munisípiu Covalima.

Akuzasaun

Prokuradór akuza katak iha 10 Feveireiru 2021, arguida Natercia de Araújo Gomes sai husi nia hela fatin hodi utrapasa ilegalmente hosi Wetabe, Biseuk, Tilomar, no iha 04 Agostu 2021 arguidu Jerónimo Dos Santos Mendonça, hakat ilegalmente ba Atambua-Indonezia liu hosi Balibo, Bobonaro ho objetivu atu gradua ba membru PSHT.

Arguidu Jerónimo Dos Santos Mendonça, deklara katak antes atu ba gradua PSHT arguidu hahu treinu subar iha Bebora, Aldeia Daro, Suku Mape, Postu Administrativu Zumalai, iha fulan Janeiru, tinan-2018 to'o iha tinan 2019.

Depoisde gradua iha 27, Agostu, 2021, arguidu no arguida tama fali mai Timor-Leste liu hosi Mota-Ain no Polísia UPF kaer toman arguidu no arguida no lori ba postu polísia Salele hodi hala'o prosesu investigasaun.

Prokurador akuza arguidu no arguida kontra artigu 244 KP, kona-ba dezobediensia ho moldura penál tinan 3 ka multa konjuga artigu 20(1), lei nú 5/2017 kona-ba Arma Brankas.

Produsaun ba Prova

Iha prosesu julgamentu, arguidu no arguida hili direitu nonok.

Alegasaun final

Prokuradór, konsidera arguidu ho arguida provadu komete krime rua hanesan dezobediensia ho prátika ilísita ba arte marsiais, mesmu iha julgamentu arguiduarguida hili direitu nonok, maibé prokuradór fiar katak krime ne'ebé inputa ba arguidu no arguida sira provadu, nune'e husu ba tribunál atu kondena arguidu arguida sira ba krime rua ne'e no aplika pena únika tinan ida no suspende ba tinan rua .

Entretantu, defeza haktuir katak iha produsaun ba prova arguidu sira deside lako'alia no tetu mós sirkunstansia atenuante hanesan arguiduarguida sira antes ne'e seidak komete krime ruma ho ida ne'e defeza husu ba tribunál atu aplika pena ne'ebé adekuadu.

Desizaun

Depoisde avalia faktu sira hotu, tribunál prova katak arguida Natercia De Araújo Gomes no arguidu Jerónimo Dos Santos Mendonça, komete krime rua dezobiedensia no prátika ilísita arte marsiais.

Bazeia ba faktu provadu hirak ne'e tetu mós sirkunstansia atenuante sira hanesan arguidu arguida foin primeiravéz mai hatan iha tribunál, nune'e tribunál konklui prosesu ne'e no kondena arguidu arguida sira ho pena multa US\$45.00 ne'ebé arguidu arguida sira sei selu0.50 sentavos

kada loron durante loron 90. Tribunál mós fiksa pena alternativa durante loron 40 prizaun, bainhira arguidu arguida la kumpri pena multa refere.

15. Danu Agravadu

Nú. Prosesu : 0040/21.PDSUA
Kompozisaun Tribunál : Koletivu
Juiz : Dr. Samuel da Costa Pacheco, Dr. Benjamin Barros no
Dra. Patricia de Araujo Fatima Barreto Magno Xavier.
Prokuradór : Dr. Rafael Jeronimo Gusmão
Defeza : Dr. Albino de Jesus Pereira
Desizaun : Absolve

Iha 25 Abril 2022, Tribunál Distritál Suai, prezide julgamentu leitura akordaun ba krime Danu Agravadu, envolve arguidu Cesartino Cardoso hasoru lezada Maria Cardoso nu'udar nia banin ki'ik, iha Munisípiu Covalima.

Akuzasaun

Prokuradór akuza katak iha 14 Feveireiru 2021, haleu oras tuku 13:00 lokraik, arguidu Cesartino Cardoso ba tesi tiha lezada Maria Cardoso nia ai-teka hamutuk hun 42 (haat nulu resin rua). Ai-teka sira ne'e pertense ba lezada Maria Cardoso nia inan ho aman (matebian ona) mak kuda hahu husi tinan 1974. Ai-teka sira kada hun ida ho total US\$25.00 no ai-teka hun 42 ho total US\$1.050.00

Prokuraór akuza arguidu kontra artigu 259 nú1, alinea (d), kona-ba danu agravadu ho moldura penál tinan 2 too tinan 8.

Produsaun ba prova sira

Iha julgamentu, arguidu deklara katak iha 14 Feveireiru 2021 arguidu ba tesi ai-teka hamutuk 32 la'os 42, arguidu mós deklara katak data no fulan la apuradu maibe iha tinan 2004 arguidu rasik mak kuda ai-teka sira ne'e.

Alende ne'e, lezada kontinua konfirma faktu hotu iha akuzasaun no deklara mós katak iha 2003 João Gonjalo nu'udar lezada nia tiun mak tesi uluk tiha ai-teka sira ne'e, depoisde ai-teka sira ne'e moris fali no iha 14 Feveireiru 2021 arguidu mak ba tesi tan ai-teka.

Testemuña Naipolo Ximenes hanesan lezada nia tiun depoimenta katak ai-teka refere sasin ho arguidu mak kuda, data no fulan la apura maibé iha tinan 2004, testemuña deklara liu tan katak iha 2003 lezada nia tiun João mak ba tesi uluk ai-teka ne'ebé iha arguidu nia plantasaun.

Alegasaun final

Prokuradór, haktuir katak iha julgamentu rona, lezada no sasin sira nia deklarasaun, prokuradór duvida ba deklarasaun husi lezada no testemuña sira ne'e, nune'e husu ba tribunál atu kondena arguidu tuir artigu 259 KP nian.

Enkuantu defeza haktuir katak, bazeia ba arguidu nia deklarasaun ho testemuña nia depoimenta, katak ai-teka sira ne'e pertense ba arguidu nian tanba iha tinan 2004 arguidu rasik mak kuda, nune'e husu ba tribunál atu absolve arguidu.

Desizaun

Depoisde avalia faktu sira hotu, tribunál konsidera faktu ne'ebé dun ba arguidu ne'e la provadu tanba ai-teka ne'ebé arguidu tesi ne'e pertense ba arguidu. Bazeia ba faktu la provadu hirak ne'e, nun'e tribunál konklui prosesu ne'e no absolve arguidu.

16. Kontra Bandu

Nú prosesu : 0025/21. BBBGD
Kompozisaun Tribunál : Koletivu
Juiz : Dr. Samuel da Costa Paseco, Dr. Benjamin Barros no
Dra. Patricia de Araujo Fatima Barreto Magno Xavier.
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena prizaun tinan 2 suspende ba tinan 2

Iha 26 Abril 2022, Tribunál Distritál Suai prezide prosesu julgamentu leitura akordaun ba krime Kontrabandu envolve arguida Juliana Pereira hasoru estadu RDTL, iha Bobonaro.

Akuzasaun

Prokuradór akuza katak loron no fulan la apuradu maibé iha 2021, iha oras tuku 09:00 dadeer, arguida sosa sosis kaixa lima kada kaixa ida ho valór US\$25.00 no hamutuk ho valór US\$125.00. Banhira arguida lori sasan sira ne'e to'o iha mota ain, Polísia UPF ka'er arguida no prende objetu sira ne'e no lori arguida ba submete investigasaun iha postu Batugade. Antes ne'e arguida hatama ona sasan sira hanesan sosis ilegamente ba kazu ida ne'e hamutuk dala lima ona.

Arguida la iha karta lisensa kona-ba inporta no exportasaun, konsekuensia husi arguida nia hahalok ne'e lori prejuizu ba estadu.

Prokuradó akuza arguida kontra artigu 316 nú (1) KP kona-ba kontra bandu ho moldura penál tina 2 to'o tinan 6 ka multa.

Produsaun ba prova sira

Iha julgamentu, arguida konfesa integralmente ba faktu sira iha akuzasaun no deklara katak depoisde akontesimentu nia lahalo tan ona hahalok hanesan ne'e, arrepende ninia hahalok no foin primeiravéz mai hatan iha tribunál.

Alegasaun finál

Prokuradór haktuir katak arguida konfesa integralmente ba faktu sira iha akuzasaun, nune'e konsidera hahalok arguida nian provadu komete duni krime kontra bandu tuir akuzasaun. Tanba ne'e, husu ba tribunál atu kondena arguida ho pena multa tuir kondisaun arguida nian. Entretantu defeza mós haktuir katak, konkorda ho alegasaun prokuradór nian.

Depoisde julgamentu, tribunál koletivu entende katak arguida hasai sasan bebeik ba faan ona iha Indonezia, nune'e tribunál koletivu halo tiha alterasaun kualifikasaun kontrabandu nú 1 ba fali nú 2, ba iha alterasaun ne'e prokuradór no defeza la iha opozisaun.

Desizaun

Depoisde avalia faktu sira hotu, tribunál prova katak arguida hasai sasan sosis ilegalmente liu husi mota ain. Bazeia ba faktu provadu hirak ne'e tetu mós sirkunstansia atenuante sira hanesan arguida konfesa, arrepende ninia hahalok, promete sei la komete tan hahalok hanesan iha futuro no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena prizaun tinan rua no suspende ba tinan rua.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>